



20. Marts 2022

UPA 2022/23&24
Siverth K. Heilmann

Uunga siunnersuut: Suliffissarsiortunut ikiorsiissutit pillugit Inatsisartut inatsisissaat aamma uunga siunnersuut: Pisortanit ikiorsiissutit pillugit Inatsisartut inatsisissaattut siunnersuut.

(Isumaginninnermut, Suliffeqarnermut Nunamullu Namminermet Naalakkersuisoq)

Suliffissarsiortunut ikiorsiissutit, pisortanillu ikiorsiisarnermut inatsisartut inatsisissaattut siunnersuutissat Naalakkersuisut saqqummiussaqaarnerannut qujanaq, imatullu Atassummiit oqaaseqarfigissavagut.

Nunarput namminiilivikkusuttoq, suliffissat aningaasarsiorfissallu ataavartut qaffassarniarnerini, nunaqavissunik sulisussanik amigaateqaraluarluta, avataaniik tikisitsisarnerput annertusiartuinnarpoq. Taamatut ataqatigiinngitsumik ineriartortoqarnera toqqissisimanarinagu aatsaat Atassummiit oqaaseqarfigilinngilarput, nunattami aningaasarsiornera unittuussanngippat, aalisartortagut tulaassuinerat unittuussanngippat avataaniik sulisussanik tikisitsisarnissaq kissaatigineqartoq, Atassummiit tapersersorsimavarput.

Ukiuni kingullerni politikikkut oqaasinnaarput, kikkut tamarmik, inuusuttuniit utoqqaallu peqqissut sulerusuttullu atorfissaqartillugit. Utoqqaat qujanaqisumik inuuneqqortusiartuinnarnerannullu atatillugu suli pisinnaatillutik sulerusuttu pisartagaqalersimappata ilanngartuunneqaratik akileraartiinnarlugilli periarfissiisinaanissamat inatsisiliortutut ilanngullugu ikiortiseraassi. Utoqqaalli ukiorpassuarni sulerulussimasut soraarninngornissaminnullu killissaminnik naammatsissimasut, matumani ataqqineqarnissaat eqqorreqassanngitsullu Atassummiit ersarissaqqikkusupparput.

Soorumami qangamut pisarsimasunut sanilliussissagaanni oqaannartariaqarpoq, ukiuni makkunani politikikkut qinikkat allanngorartuarneranni, siunnerfiit allanngorartuarlutillu naleqqussarneqartuarmata, taamaattumillu allatulluunniit isummersortaraluaanni pitsaanagerisarisat politikikkut ikinnerussuteqarfigigaanni anguneqarsinnaasannngimmat.

Aap nunarput aalisarneq kisiat isumalluutigiginagu, nunami suliffissanik aningaasarsiorfissanillu ukiorparujussuarni atasinnaasunik, avataaniik aningaasaliisoqartarnera iluaqutigisarparput. Ajoraluartumillu aamma politikikkut aqqiagiinngitsoqartarnera pissutaalluni ilaat ugoornaqisumik suliffissarpassuatsiarsuit piviusunngunngitsoortarput. Tamakkuli uniffiginagit, innuttaasut politikkerillu kissaatiminnut akissaqalernissaat nikalluunnagu Atassummiit aqqutissiuuttuassavarput.

Ajoraluartumik inuppassuaqalernikuuvoq inatsisitigut periarfissiisutaasunik ima ilikkaassisimatigisunik, suliffissaarunnermut ikiorsiissutinik pisartagaarunnissartik annaarusunnagu,



sulilaaginnariarlutik asoorallartartut, suliffissaaruttutullu naqitsiartuinnarsinnaasartunik. Soorunami ilaat patsisaasinnaasut suliffeqarfiit ingerlatitaaneranut tunngasuusarneri arajutsisimangilarput.

Aporfiit pitsaaqutillu taagorneqarsinnaasut amerlagaluaqisut, taamatut naalisaalluta Atassummiit inatsisissatut siunnersuutigineqartut saqqummiunneqarnerini oqaaseqarfigaarput, suliali aappassaaneerneqartigani, tusarniutinut qisuariaatigineqartut oqaaseqaaterput ilanngullugu ataatsimiititaliamut peqqissaarullugu nalilersuisoqarnissaa kissaatigaarput.

Qujanaq.